

欽
定
全
唐
文

欽定全唐文卷八百二十六目錄

新文藝出版社藏書

黃滔 五

龜洋靈感禪院東塏和尚碑

華嚴寺開山始祖碑銘

福州雪峯山故真覺大師碑銘

司直陳公墓誌銘

祭陳侍御

祭先外舅文

祭崔補闕

祭陳先輩

祭林先輩

祭右省李常侍

祭司勳孫郎中

祭宋員外

祭錢塘秦國太夫人

祭南海南平王

欽定全唐文卷八百二十六

黃滔 五

龜洋靈感禪院東塏和尚碑

三教之垂萬古也咸以師弟子授獨釋氏之師弟子削姓以名別爲父子之流葉東塏和尚葉真身大師其道偕極不可思議以父子言克盡弓裘之善和尚法號志忠俗姓陳世居仙遊祖諱璠父諱節繼以好尚山水崇佛友僧生和尚自於乳抱鼻逆羶辛九歲詣真身大師爲童子一見之兩如宿契年十五落髮初大師之卜龜洋也雲木之深

藤蘿如織狼虎有穴樵採無逕俄值六眸之巨龜足躡四
龜俯仰其首如作禮者三逡巡而失遂駐錫卓庵名其地
曰龜洋焉龜洋之泊也孟不及村畬不及菑山產菜號苦
蓋以之充卯而齋惟大師與和尚俱歲移月更名馳跡漏
檀信尋而施漁獵投而事時謂之二菩薩僧其他或來人
之稍乖嚴潔則立有蛇虎驚吼之怪及武宗皇帝乙丑之
否棄之而條帽潛匿大師允檀信之迎隱於數家和尚棲
於巖穴之內不離茲山相伍者麋鹿馴伏者虎狼旣而靡
耕菑杜施丐還取苦蓋之卯至今茲院之逢歎歲一邱之

風不泯宣宗皇帝復寺之始議者以靈巖之奇勝非我菩薩僧不可以宏就由是都人環乞大師以居故和尚獨薦龜洋之址焉松堂揭而覺路喧天金磬敲而道花滿地誠以上昇道士不受籙成佛沙彌不具戒和尚且不之然旋將西游受具足戒於襄州龍興寺大中十二年東還由廬陵與草庵和尚值草庵曰來自何山曰六眸山曰六通乎曰慧非重瞳和尚蓋行高而言寡是日對答如流旣及本山入地愈盛院落則不營而峻供捨則不化而來咸通三年靈巖力圓乃迎大師返於茲八年大師坐亡法身不壞

南北歸敬闐然無時和尚以之煩十三年遂南五步里之
山得峯之秀室而禪焉即今南畝也廣明元年弟子智朗
惠朗元鑒藏輝景閑宏幹鴻超悉以植性祇園分光慧炬
以謂我大師承法馬祖親得心印則和尚焉今以宿曉而
晦辭煩即靜不可使六眸靈感之地畱形示滅之異葉其
葉而不之大乎於是迓乞歸於院將以宏張法輪式救迷
津其如感通雖然現沒有數中和二年是時公尚
未登甲科龍集壬
寅三月十日示滅壽年六十有六僧夏二十有五後二旬
之一日建窆堵波於東岡焉嗚呼和尚之道不粒而午不

宇而禪與虎狼雜居所謂菩薩僧信矣其三月之朔語其衆曰至道之有顯晦師弟之不欲雙立昔大師之去也畱形爲之顯今吾之行矣速藏爲之晦故將儀貌若生而蓋棺晦朔不逾而故土從付囑也其上足景閑宏幹以凡紀道名須資詞筆懇賁行實扣愚求文滔早訪蓮扃今悲松塢敢辭抽思用刻貞銘爲之銘曰

六眸獻山二葉開蓮號及菩薩正真自然雲林匿跡狼虎參禪仙花撲地智月懸天示滅之滅顯晦岐焉布金左岡建塢開阡實歸上界豈曰下泉松風栢雨空悲歲年

華嚴寺開山始祖碑銘

師法號行標俗姓方祖榮父安甫之盛族也師生於建中二年辛酉齟齬即穎悟異於諸童九歲投玉澗寺監寺神皎出家將二年嘉其拔萃命之落髮師以梵行未至不敢預大僧數至貞元十七年

時師年二十一

方薙鬢髭翼日遽講所

習涅槃經一寺歎服旣而辭其師北遊抵京薦福寺受戒品詣章教大師法會章教奇之令首其衆凡十年士君子之造者無不聳慕尋爲功德使推入道場憲宗善之元和十一年

丙申師年三十六

東歸復於玉澗焉法雨隨車慈雲被物

洎武皇帝

會昌元年辛酉

除佛舍籍釋子於戶部師則巾華陽衣

縫掖晦迹樵客廬於西巖石室律身守道如居千衆及宣

皇帝復寺

大中元年丁卯師年六十七

刺史瑯琊王公迎以幡花舍於

郡開元寺俾爲監領大中六年

師年七十二

師以環足之煩擁

旅之數乞歸故山先時玉澗之北巖泉石之奇也卜而居

之縣令中山甄宿與莆之士庶爭沐醍醐共隆蘭若烟巒

蔽虧朱碧掩映前俯平川後峙奔嶠地自人勝名由道高

刺史河東薛公仰其孤風復馳開元之僧衛以入郡日扣

華嚴大義幾忘食寢洎解印與之偕至北巖題之爲華嚴

院以徹祠部焉師咸通六年七月五日示滅壽八十有五
僧夏六十有四後四十有五日建窆堵波於西岡十一年
其徒從紹疏師行實於闕昇其院爲華嚴寺有徒三十人
皆肅肅可觀不忝師門於戲師儀梵骭髀言詞雅直沖默
而明敏慈恕而剛毅儒書皆通三皇五帝之道言未嘗及
而人知其博古也經論綜貫天堂地法之說舌未嘗舉而
人皆務崇善也所至清風凜凜政所謂釋子之高傑者也
弟子道光道圓令詢悉器傳師道愚冠扣師關壯以隨計
乾寧二年忝登甲科東還薦造金地歲周三紀膠掌而拜

影堂腹藁而銘遺美不可使桑門大士泯而無述焉故銘
曰

智月不缺乘虛照物道花不衰吐豔無時洞徹照灼傑然
吾師稟薦福戒分章教枝厥宗得雋內庭擢之御香徹印
雲間資期數有汙隆道無磷緇德風徒襲法舸寧維山幽
跡高身沒名垂松塢雖故竹毫可追稽首影堂敬刻斯碑

福州雪峯山故真覺大師碑銘

大師法號義存長慶二年壬寅生於泉州南安縣曾氏自
王父而下皆友僧親佛清淨謹志大師生而鼻逆薰血乳

抱中或聞鐘磬或見僧佛其容必動以是別鍾愛於膝下
九歲請出家叶而未即十二從家君遊莆田玉澗寺寺有
律僧慶元持行高潔遽拜之曰我師也遂畱爲童子焉十
七落髮淳樸貞古了與流輩異暨武宗皇帝乙丑之否乃
束髮於儒冠萊中而蓬跡來府之芙蓉山宏照大師見奇
之故止其所至宣宗皇帝之復其道也涅而不緇其身也
袞然而出北遊吳楚梁宋燕秦受具足戒於幽州寶刹寺
訖巡名山扣諸禪宗突兀飄颻雲翔鳥遊爰及武陵一面
德山止於珍重而出其徒數百咸莫之測德山曰斯無偕

也吾得之矣咸通六年師歸於芙蓉之故山其年圓寂大
師亦自瀉山擁徒至坐於怡山王真君上昇之地其徒熟
熟師已嗣德山纍纍而款關師拒而久之則有行實者始以師同
而議曰師之近巍巍乎法門圍遶之所不可造次其地宜
若鷺嶺猴江之爲卜府之西二百里有山焉環控四邑峭
拔萬仞嶮崿以支圓碧培塿以覩羣青怪石古松棲蟄龜
鶴靈湫邃壑隱見龍雷山之半頂之上則先冬而雪盛夏
而寒其樹皆別垂藤蘿芊茸而以爲之衣交錯而不呈其
形奇姿異景不可殫狀雖霍童武夷無以加之實閩越之

神秀而古仙之未攸居誠有待於我師也祈以偕行

去聲秋

七月穿雲躡蘚陟險昇幽將及之師曰真吾居也其夕山之神果效靈翼日巖谷爽朗煙霞飛動雲庵旣立月構旋隆繇是柅法輪於無爲樹空門於有地行實乃請名其山曰雪峯以其冬雪夏寒取驚嶺猴江之義斯則庚寅逮於乙未師以山而道侔山以師而名出天下之釋子不計華夏趨之如赴召乾符中觀察使京兆韋公中和中司空潁川陳公每渴醍醐而不克就飲交使馳懇師爲之入府從人願也其時內官有復命於京語其道其儕之拔俗悟空

者請蛻浮華而來薙僖宗皇帝聞之翰林學士訪於閩人
陳延郊得其實奏於是聖錫真覺大師之號仍以紫袈裟
俾延郊授焉大師授之如不授衣之如不衣居累夏辛亥
歲朔遽然杖履其徒啟而不答雲以隨之東浮於丹邱四
明明年故府侍中之有無諸闕尅句洗兵於法雨致敬於
禪林馥師之道常東望頂手後二年自吳還閩大加禮異
今閩王誓衆養民之外雅隆其道凡齋僧構刹以之龜焉
爲之增宇設像鑄鐘以嚴其山優施以充其衆時則迎而
館之於府之東西甲第每將儼油幢聆法輪未嘗不移時

餘乎一紀勤勤懇懇熊羆之士因之投跡檀邨漁獵之逸
其或弭心鱗羽戊辰年春三月示疾吾王走鑿鑿至粒藥
以授師曰吾非疾也不可罔子之工卒不之餌其後札偈
以遺法子函翰以別王庭夏五月二日鳥獸悲鳴雲水慘
悴其夜十有八刻時滅度俗八十有七僧臘五十有九以
其月十五日塋其藏焉其塋也其徒僉云以山之奇堂之

峻

法堂也

大師之生也王

去聲

是其歿也不宜捨諸故坎其中

焉若干尺之高若干尺之周皆雕珉石錯火壤磷磷焉業
業焉四隅則環宇以庥玲瓏窳窳雲霞時入風雨罔侵其

日奔閩之僧尼士庶僅五千人閩王娑之子降左金吾衛將軍檢校刑部尚書延稟始陳祭是設齋焉大矣哉大師之見世于是罔量其僧耶自始及茲凡四十年東西南北之夏往秋適者不可勝紀而常不減一千五百徒之環足其趨也馳而愈離辯而愈惑常曰三世諸佛十二分教到此乃徒勞耳其庶幾者若干人其一號師備擁徒於元沙今安國也其二號可休擁徒於越州洞巖其三號智孚擁徒於信州鵝湖其四號慧稜擁徒於泉州招慶其五號神晏今府之鼓山也分燈之道皆膺聖獎錫紫袈裟而元沙級宗

一大師招慶元晤大師鼓山定慧大師之命焉其曹早曰
法雖無說名以文垂自少林之建曹溪無不刻碑而紀頌
我師其默乎一旦惣其曹句首曰從智如堵而扣愚求文
滔老且病刊勒之加多已辭避欽師之道不覺聳然偉夫
恭聞釋波之東注也流其象則不流其旨流其旨則不象
其形厥初大迦葉之垂二十八葉至於達摩達摩六葉止
於曹溪分宗南北德山則南宗五葉大師嗣句其今六葉
焉雪峯之分元沙洞巖鷺湖招慶鼓山其道皆離貝葉以
祇其七非滔之能言也但美數公葳蕤其葉衆多殷勤之

請遂爲之銘而應其求其詞曰

曹溪分派誰繼南宗一言冠絕六葉推雄無物之物非空
之空不瑩而明不增而隆縮靡秋毫舒靡鴻濛不有靈鏡
曷揚真風懿彼閩越巍乎一峯洞壑斯異雪霜罕同天之
有待師也云鍾名將道協跡與仙崇奔走厥徒百千其叢
庶幾幾人莫不元通分燈照耀樹本玲瓏聖君寵疊賢王
敬重不生不滅曷始曷終刻貞石於斯文旌厥德於梵宮

司直陳公墓誌銘

姬孔之教與日月以懸天顏閔之馨作芝蘭而出地可不

誅清塵於桂苑揭貞石於松阡敘白楊之別生悲風示黃壤之下藏嘉氣者哉漢太邱長二十三世孫南安縣尉諱真生處士薨薨生大理評事齊忠信篤敬不類今世嘗有白雀巢其庭宇佳蓮產其池塘識者謂其後必大有子九人皆力儒學公其長也諱嶠字延封齟齬好學弱冠能文與高陽許龜圖江夏黃彥修居莆之北巖精舍五年而二子西去復居北平山兩地穴管寧之榻十霜索隨氏之珠然後應詔諸侯求試宗伯而以咸通乾符之際龍門有萬仞之險鶯谷無孤飛之羽才名則溫岐韓銖羅隱皆退黜

不已故公自丁丑之及丙申高價馳而逸步躋旣而大盜
移國德公文行之深者安州鄭郎中誠孫拾遺泰嘆而勉
之久乃持輦下之屈名適蜀中之貢府致卿士倒屣場席
開路清風旣而竊爲權官沾諸將求識而薦之公時已出
經試比言之者闕一字策帋而亡是舉光啟二年收開三年
榮登故相榮陽鄭公禮部上第大哉公爲人謹信居家純
孝事繼親彌善廬先君墓泣血有聞其所爲文扣孟軻揚
雄戶牖凡三百篇有表奏牘頗爲前輩推工且大唐之設
網士得之於是者歲幾人焉矧復有避宦者之節若走衝

虛之車馬榮陽公自以得人其春首門人脫麻攝京兆府
參軍司空太原公帥閩解榻以禮辟之爲大從事受大理
評事兼監察御史今府相繼擁於節旄益賢其參畫奏大
理司直兼殿中方期輟從藩屏入踐諫垣不幸寢疾浹辰
不起享齡七十有五光化二年十月三日嗚呼將來失其
龜鏡斯者喪其般倅雖登大年終恨朝露三年庚申正月
十七日丙午葬於泉州莆田縣崇教里北平故山禮也公
兩娶魯國林夫人榮陽潘夫人其子三人仲曰說買石太
湖刊文愚與公同邑閩越江山莆陽爲靈秀之最貞元中

林端公藻冠東南之科第十年而許員外稷繼翔其後詞
人亶亶若陳厚慶陳泛陳黯林顥許溫林速許龜圖黃彥
修許超林郁俱以夢筆之詞簞金之學半生隨計沒齒銜
冤曠乎百年而公追二賢之後七年而徐正字寅捷八年
而愚字闕一莫不以江山之數耶猗歟昔之負高才不以位
而碑者襄陽惟孟先生焉今也累懿德不隆位而碑者以
陳夫子始愚沾巾宿草無媿抽毫其辭曰

江山之秀鍾乎人純孝高節并其身掬茲二美摘爲雄文
以之登桂科以之列蓮賓斯爲君子誰曰未仁嗚呼九原

金史卷之二十一
卷之二十一
宜樹貞珉

祭陳侍御嶠

維光化三年歲次庚申正月庚寅朔十五日甲辰將仕郎
守國子四門博士黃滔謹以清酌之奠敬祭於侍御陳君
延封之靈伏以靈閭之江山莆稱秀絕首武德之科級自
貞元之英哲其後繼生碩儒疊疊鴻都交懷荆璞互握隋
珠皆指期於拾芥終慟哭於彎弧洎宣皇之後年則夫子
之斯出持曾參之孝行袖孟軻之文帙薦賦諸侯上書聖
日射宮而勁挺弦矢藝圃而葳蕤華實難亨者吾道難偶

者至公管仲三奔非戰之過孫宏十上蓋時未通七千里
而辛勤上國二十年而惆悵東風人皆一一以興憤我獨
孜孜而養蒙旣而鳳闕飛塵龜城挂榜儀曹方急於中興
權宦輒窺其上賞殊不知楊吟誦於犬子景薦延乎商鞅
古爲不然吾肯斯倣誰不竒夫子之節誰不高夫子之名
冰霜卻污松栢居貞渭水之釣有守武城之徑寧行逮夫
岷峨歲改岐雍煙清天子復含元謁見有司新都省權衡
巍巍令聞赫赫嘉聲遂從寰海迴翥蓬瀛振輝光於甲乙
開道路於孤平望高而先脫麻衣家遠而須榮鄉土十二

人林君茂躅一百年莆邑大數君侯設醴以前席里巷拜
塵而如堵雷車轢轢鶴賀翩翩初命就門見東周之三語
前程不日候西漢之七遷旋以孔罇引滿徐榻解懸白壁
黃金而疊矣玳簪珠履以加焉列藩所得者賢才古人所
重者知己旣將推珍於席上豈獨矜詞於雪裏莊周說劍
則韓魏呈鐔郭隗昇臺則樂鄒覲止繡衣曜日驄馬嘶煙
飛詔而賓階次第假途而棘寺盤旋莫不漢帷駐策薛石
畱牋從容渥澤寵異淹延胡言薤露忽敗椿年嗚呼石火
風燭驚波逝川聖賢之不免矣古今之共痛焉滔江鄉則

中外親姻帝里則參差硯席干名而後乎一紀論友而仰
乎三益蟬槐給念幾同京洛之愁鶯柳看時各署神仙之
籍別來輦下歸自甌中塵忝而郗詵桂綠因依而王儉蓮
紅斷金益固投漆攸同見行藏於柱史論倚伏於塞翁實
期以始者文場之懿德邇來使府之清風伏蒲北省起草
南宮更雪當時之寃滯少爲吾黨之隆崇是何天之喪道
之窮怱怱大夜默默元穹滔復曉夕以思江山之事林君
則以合浦垂名夫子則以申秦得意高步斯振宏規靡異
前輩曠世後來遂志俱蟠使下之栢俱擅乙中之二

林端
公貞

元七年首闕越之科第以珠還合浦賦擅名後十年莆邑
許員外榮登自此文學之士繼踵而悉不偶時曠八十七
年始鍾於延封其文以申秦續篇擅名後六七年徐正字
及第兼滔塵忝林端公同延封榜皆第十二人皆開路於
後人皆終使府大判官判官推是言之豈偶然耳賢哲相
皆栢臺林荆南延封閩中也望今昔一致嗚呼延封昨日而冰壺仙霧今辰而丹旆芻
靈雖死生之理能一終痛傷之懇罔寧況以平生樹德幽
宅刊銘無慙郭泰之賢賤毫曷措爰枉趙岐之寄涕淚交
零水咽雲愁風悲日暮精靈一閉於泉壤歲月空蒼於壠
樹椒壺略備蘭俎聊具申永訣於斯言庶冥感其誠素焉
呼哀哉

祭先外舅文

惟靈伏以彼蒼者穹禍淫福善噫何斯言之或謬歟錢鏐
壽而顏淵天盜跖宥而嵇康刑屈原冤而文考溺冉惡疾
而左喪明胡其然哉胡其然哉伏惟明靈柳蔥松峭山嶷
鶴孤落落君子行行魯儒始者辭鷗西邁希鵬北徂高高
蟾桂赫赫鴻都和贄之學三泣宋盧之俟一呼而以氣直
志大數竒道汙大中季之計車奔走咸通際之名路崎嶇
於是涕唾聲華毫釐簪笏枕中罷競於名位壺裏別窺於
日月東尋玉錄則龍虎差我南訪金沙則羅浮突岼北固

風清西陵月明蘭舟泊岸金磬飛聲塵埃謝傳之叔姪夢
寐茅家之弟兄古觀秋住靈蹤日行松下之齋宮肅肅雲

山之醺火熒熒鑪然北癸鼎化西庚羽人傾蓋府帥投誠

說浙西周體范居陶象端適衛蓋婚嫁之須了匪貨財之所繫

愈高雲鶴之逍遙益笑匏瓜之繫滯何武江都蕭牆禍儲

羊腸莫守蝸角旋孤

說淮南高

蕭條陳蔡之園聖賢大困惆悵

崑崙之火玉石俄俱綿邈吳山蒼茫閩海遽聲沉而響絕

薦時移而歲改絡秀愁積孟光泣倍山頭之鶴駕無覩水

底之鯉書空待宅相征輪梁園洛濱見徐甲之移主知伯

陽之蛻身海山失翠烟樹亡春溜竊惟早歲忝拜清塵蒙
以拾青相器投漆相親鑒羲之必晉朝名士識陳平爲漢
代英臣爰將淑女俾結嘉姻十載不攀於桃李兩誠空貫
於松筠愚以感明靈之殊義戴明靈之至仁金重季布枝
輕郗詵逡巡東越拖擲西秦實期歸釣嚴灘終棲鄭谷戶
外山碧樽中酒綠將仰止於樂冰冀參差於衛玉豈意寂
寥音信髣髴幽明聖人之齊始卒君子之一枯榮天上之
鵲橋宜度人間之鴛被須成開簾烏囀迴轡蜩鳴東牀則
黯黯愁色南渭則哀哀哭聲嗚呼哀哉平生氣槩昔日忠

貞龜齡易昧駒隙斯驚在物之理豈人之情愚輒疑道家
有形全氣全兵解木解考斯事矣或其義也不然者胡埋
南祖之蛇罔念北翁之馬嗚呼哀哉列塚開阡重泉九原
古之所制今也斯存伏惟明靈魏夫人遺蓮峯而取喻葛
仙翁賸竹枝以爲論固以神遊蓬島洞入桃源然則不樹
松栢罔詒子孫是用葬喬山之冠劍招湘浦之精魂滕公
啟室宋玉申言曰楚山青兮淮波綠劉鷄飛兮隨鵲覆遺
蹤脫屣辭彼俗楊柳霜多不堪矚螺江淺兮甌山陰繼昇
天兮徐董任風爲輪兮雨爲轡東歸來兮北追尋陳桂席

兮奠椒漿樹馬鬣兮開壽堂千秋萬歲兮舊江鄉魂歸來
兮山之陽詞咽淚迸猿悲鳥傷東波送恨西日沉光雪耀
霜明而莫覩芝焚蘭蕪以空芳孀妻捧奠出女尸喪嗣男
而杳杳江嶺鄙子而明明肺腸劍以求心而克許樂以悲
告而寧忘願明靈之冥感鑒蘋藻於壺觴嗚呼哀哉

祭崔補闕

道融

故右補闕博陵崔府君之靈惟靈大唐有進士科無巖穴
詔故鵠版之降不易其人元和之起也則有陽諫議城凜
凜清風其不起也則盧諫議全昭昭高道一以權豪之忌

空福道民一以堯舜之世但樂箕穎其後陸君洿以忠勲
應召惠君實以忠議赴徵未委起草伏蒲何如人也洎博
陵崔君之生也迥稟高竒兼之文學近則繼李飛之蛻隨
貢遠則同毛義之志奉親東浮謝公舊州式避戈戟遁於
仙巖濬谷克業經綸而以酒肥肉羶澤馨川媚五辟三顧
懸榻開樽不辭小國之權蓋切高堂之養旣而大君之思
夢說四輔之急薦雄繫三詔而就門參七人而列職仲舒
謁帝必演春秋呂望投竿定爲師傅柰何龍蛇起陸烏兔
無光莫扶劉氏之宗桃空泣袁安之涕泗甌中越絕養素

守蒙賢王之結嘉姻時議之期良輔豈意皇天不祐白日
無憑消渴之亟茂陵少微之入瑤桂芝焚蘭蕕梁壤山頽
雖人生之有定期實士德之爲不幸嗚呼閩中三月烟光
秀絕脂轄赴闕鯤鳳嘈囀其猶南浦魂斷北梁涕咽而況
昨日軒車今朝塗芻唱薤露以出門飛粉旌而戒途五離
擇日九泉卜居其在樵蘇其在博沽至於路行尚皆悲吁
矧其嶽嶽之曰男子鏘鏘之號魯儒識通龜策握耀蛇珠
數百篇有唐之詩數千字中興之書國風騷雅王佐謀訐
沉光之猶衝斗垂翼之未搏扶賁志歿地其痛何如雲物

爲之無色剛忍爲之不愉滔飲風永嘉傾蓋無諸多君於
士元廊廟待我以叔度陂湖交言旣異投分斯殊方俟彈
冠仰修程於霄漢誰云執紼悲落景於桑榆豈鬼神之害
良善而吉凶之昧賢愚顏回先死盜跖後殂世之災眚生
之毒痛愴恨風燭淒涼隙駒肴匪豐俎酒匪馨壺歎松蒿
而永往託蘋藻以聊舒明靈有感鑒而歆歎已乎已乎噫
噫

祭陳先輩

鼎

維光化四年歲次辛酉正月二十七日祭於東君之靈閣

山秀氣魯國清塵天之授受鍾我仁人卓矣生世學而立
身衛玠則旁輝其舅曾參則大孝於親始者隨計歸越上
書入秦擅價而侯門傾動呈功而鳳藻精新咸通之年九
霄也鵠路乾符之際萬仞也龍津旣而甌嶺經兵蜀川迎
帝匪無隨駕之懇實切問安之計肩負焦飯志銷丹桂雖
深藏豹之誠難遏化鯤之勢都堂昔日困一千輩之交鋒
大國中興作第二人之登第杏園醉後華表歸時往歲井
邑茲辰羽儀旋屬姑蘇積釁勾踐興師於是板輿避地草
檄從知百越之江光洵湧四明之山翠參差長鯨旣剔逸

足難羈東別朱門南還故里一朝而奄至泣血三載而蔑
聞見齒仲由此後千鍾之祿悠哉毛義終身一檄之榮已
矣修程不顧盛德逾馨田園草綠戶牖山青與夔龍而抗
跡追園綺而忘形且期齊鶴算壽陟龜齡是何修短之期
莫測吉凶之闕難局明神罔佑大禍斯丁士林慘怛詞苑
伶俜滔始自童年至於壯歲江鄉爲竹馬之友京輦作谷
鷲之會三朝被別棲遲泣荆璞之艱十上遭時次第到瑤
蟾之內誰言倏忽遽歎存亡痛人琴之俱絕緬膠漆以空
傷嗚呼用新平生德行曩昔文章近則孟浩然雖人間不

仕遠則卜子夏乃地下爲郎誠以高科而貞退固從陰隲
以舒張逝水東流駿烏西匿昨辰而椒桂獻酬今日而藻
蘋滴瀝且彭祖之延永壽亦至銷磨而巨卿之哭故人得
無悽惻況乎東西多故南北遥程不得親隨薤露送別松
塋旣闕殷勤而執紼空將嗚咽以沾纓謹以依稀蔬果一
二精誠願冥符於盼饗申永訣於幽明

祭林先輩

用謙

維光化三年歲次庚申十一月日敬祭於林君執友之靈
惟靈夫渥注之足以千里之爲程已馳之而俄沮嶰谷之

音以六律之爲府旣參之而忽泯夫不永其終始何痛如
之嗚呼林君得以言矣君負相如之詞賦慕郗氏之科名
一紀秦城千門襴刺雖衆口大馨其鳳藻人罕如焉而三
春累困於鶯喬數何奇也然則女貞而十年必字藥靈而
九轉須成果契至公克昇上第旣已東堂得意南國言旋
龍珠則動彩於握中鴈字則增輝於天際將冀盛清風於
吾道豈期歎逝水於人生屈原之難問者天蔡澤之不知
者命螺江烟景方翻丁令之羽毛駒隙光陰俄啟曾參之
手足誠壽夭靡移於夙契且鬼神何害於善人禍福吉凶

悠揚曖昧淒涼物理慘怛人情今則壽域斯開貞魂永蟄
壠頭水咽山上雲愁鄧攸之繼世無兒語畱身後崔曙之
遺孤有女詩在生前雖盛衰之同休亦存亡之至痛滔京
關進退硯席參差幸忝先鳴彌欣繼捷未賀桂枝之入手
忽從薤露以傷心脩短有茲吁嗟何極靈輶戒路丹旒翻
風遠寓丹誠聊陳薄奠願垂冥感鑒歆於斯嗚呼哀哉

祭右省李常侍

洵

惟靈金石呈姿陂湖稟量伊彼昭代生乎德門膺河清嶽
峻之期擅賈虎荀龍之號時稱最怒

賈家三虎
偉節最怒

家謂無雙

月中則桂樹連枝日下則鴛行接翼故得隣家醜婦競顰
西子之眉洛下諸生皆掩謝公之鼻爲大廷之領袖定千
古之風流旣而魏闕飛塵蜀都迎駕雖則急賢於行在而
志作賦於閒居畱連霅水之烟波容與松江之歲月其柰
珠以川媚蘭於澤馨從吳苑之琴樽疊堯天之雨露金臺
蒲省驄馬螭頭誠幾三顧以就門猶作八元而在野其後
七昇赴命二妙對敎天駟呈材蛟龍得水入鼇山而侍從
登鳳閣以優游名由實生位以德舉天子乃擢王褒爲諫
議昇孝若於貂璫前彰潤色之功後養燮調之業旋以機

槍未落岐雍多端忘越嶺之崎嶇慕荊州而倚托東閣之
畱連斯重北轅之行邁方營誰料彼穹者天俄奪之魄漳
濱一鬼驟苦劉楨殷氏兩楹遽鍾夫子山頽梁壞壁碎芝
焚雖人世之死生實士林之摧沮今以湖湘梗澀伊洛迢
遙北邙之路連天松楸莫附南巷之號至血邱壠權儀烟
雲慘澹於原頭猿鳥悲涼於林際滔曩從上國獲戴殊私
近慶外藩薦承厚顧每佇十旬之入拜寧期二豎以來攻
彭殤雖謂其同休幽顯其如乎永隔靈輶戒路丹旄翻風
昨辰而椒桂獻酬今日而蘋蘩滴瀝人生到此天道何言

雙淚空流九泉無曙東波嗚咽西日蒼茫輒寓茲誠謹陳
薄奠敢祈冥感髣髴歆斯

祭司勳孫郎中

惟靈趙璧呈姿隋珠稟價爲乎國器生之德門劉家則三
嘏揚芳馬氏則五常擅美故得數枝郗桂交茂鵠原一本
田荆分輝鷄樹理窟則曲臺得雋寶人則華省垂名由是
迴拔蘭宮騰光水鏡臺推二妙日俟七昇不幸岐雍多艱
干戈未偃補傾乏石救濁非膠爰攀鴈字於五湖因展驥
程於百越誰料皇天不佑彌荼斯縈遽折椿齡俄隨薤露

山頽梁壤芝蕝蘭焚雖脩短之有定期實簪紱之爲至痛
今則江湖梗澀京洛迢遙權卜靈岡寓安壽域川上之東
波嗚咽雲間之西日慘悽大夢莫迴下泉長暮滔早干輦
轂厯踐軒牆旋振羽於邱門獲陪塵於阮巷顏回短命旣
恨當年溫氏冥裝復從今日人生若此天道何言涕淚空
流幽明驟隔嗚呼哀哉輜車明發丹旄晨飛輒憑蘋藻以
寓誠用薦塗芻於永訣願垂冥感髣髴鑒歆嗚呼哀哉

祭宋員外

故軍倅觀察推官檢校主客員外郎廣平宋君希邈之靈

曰惟靈物有盛則有衰人有生則有死古今不易之數毫
髮無差之理然則厥壽苟百壽終則滅厥身苟修身歿名
畱是以顏子天而其言不朽原壤老而於道何求吁嗟希
邈藹然清休蘭杜敗而終馥松栢折而終秋德水千尋人
材八尺負雲鶴於風裁濺陂湖於胸臆旣而臺築黃金禮
先白璧爲席上之至珍運幕中之婉畫洛水波清泉山翠
橫優游五府輝映雙旌兩地之隆崇物望一方之煦嫗人
情繇是入曳珠履出居武城尊俎克彰於令譽絃歌迴振
於嘉聲才業大聞君恩薦至爰從棘寺以寵陟旋慶蘭宮

之澤被丹鳳飛詔銀魚受賜雖棠陰蓋地能資樹德以行
春而醴酒疊觴終以持盈而戒意九仙樹碧八座塘深駐
清源則一府延頸赴無諸則一郡沾襟嗚呼希邈持何道
致人如斯之欽豈非秉仁義忠孝以行己無是非毀譽以
萌心者哉柰何晉公二豎漳濱一鬼惡去藥石之內樂入
膏盲之裏冉耕惡疾以相攻長卿消渴而不止艾烟百穴
藜杖二年禍被三彭之所迫靈非九轉以寧痊嗚呼哀哉
石火風燭驚波逝水誠脩短之無改矣柰痛傷之有等焉
芝焚桂藝壁碎珠捐至於行路孰不涕漣愚一揖清塵偏

容瑣質初憐淡以如水後乃投而若漆十年之寒暑無變
三益之金蘭愈密泊夫秦城駐跡儉府叨招竊惟上榻幸
忝同僚南貳隼旗雖寄懷而稠疊北依龍節終積戀以迢
遙沙岸迎歡津樓送別且言不日之後會誰料終天之永
訣人生夢幻夫復何言世路存亡難勝痛咽嗚呼哀哉昨
日而牋函寓意今朝而蘋藻興詞駒隙之光陰如此龜臺
之學習何斯幽明驟隔音信無期加以道路脩阻弓旌繫
維慟哭寢門而莫逮叫號穹碧以奚爲聊馳一奠之椒桂
用敘千秋之別離噫噫噫噫已而已而

祭錢塘秦國太夫人

代閩王

維天復二年歲次壬戌敬祭於故秦國太夫人之靈夫生
帝王則若文母方鍾至聖生人臣則若陶母方降大賢信
夫韜昴宿之耀於胸襟掬嵩山之氣爲懷抱豈容易哉伏
惟明靈天資婦道神授母儀金石不足喻其貞明芝蘭不
足表其芬馥訓逾孟織智邁謝圍顏氏子則提育聖人曹
大家則師資諸女旣作閨門之上瑞乃生英傑於皇家立
曠代之鴻勲擁兩藩之龍節食則萬錢調膳祿則三世及
親見綵衣則衣錦之姿見冰鯉則和羹之味騰輝女史興

詠國風推於古今實無倫比乃由懿德致此大榮嗚呼靈
藥難求流光易謝本冀霜松而永壽忽驚風燭以斯零竟
成舉世之悲傷空切至誠之號慕審知幸攀令嗣獲忝親
隣論交既契於金蘭抹泣乃同於親屬輒陳薄奠用表悲
誠敢冀明靈依稀歆鑒

祭南海南平王

代閩王

故南平王之靈惟靈五羊奧區番禺巨壤漢爲列郡唐作
雄藩總百蠻五嶺之殷有出將入相之盛是故地啟嘉數
天生大賢濬六韜三畧之才謀韞五袴二天之政術俾其

於家受詔衣錦襦牙控二十四州之繁難當二十八齒之
美茂光揚千古冠絕一時鍾其明靈其昭昭矣至若恢張
霸業揚簸清波臺陟九層靡慚郭隗劍提三尺授自呂虔
爰持副貳之雄姿遂領節旄之重寄由是澤施甘露令肅
秋霜掀文房武庫以連雲騰逸氣英風而偃草上榻則阮
瑀下賢則左車從善則軾閭宣威則斷案故得越伏波之
銅柱獻款而來感鄂公之鐵鞭呈祥以見火山改色珠浦
生光無煩處默之酌泉大鄙趙陀之累土然後鳴鐘出入
調鼎昇聞致交趾之封疆歸石門之教化九遷渥澤克居

浴鳳之池雙立節旄遠過跼鳶之水雖士鮪列弟兄三地
山簡兼荆湘四州語未同年事推曠世嗚呼是何才德之
若彼功業之如此而彼穹者天不壽其齒畢雲龍之契會
與龜鶴而等倫矧天子方欲使降皇華恩宣金冊表裏東
周之盛旌崇南越之隆胡二豎之亟攻竟三醫之莫救泰
山頽壞俄興孔氏之歌漢水淒涼遽罷羊公之市實國家
之不幸實藩鎮之不幸某早塵興國旋忝睦鄰雖瓊樹之
未親若銅盤之已接方定金蘭之至分豈期幽顯之驟殊
況以幸結良姻累交專介幕下崔員外昨馳禮幣嘗詣門

牆愛蒙執手之懽宏敘親仁之旨今則遽悲存歿益歎彭
殤故將薦舉征塵躬申薄奠九泉注望於歎逝以難勝五
月指期表同盟之必至嗚呼哀哉曩馳羔鴈今遣蘋蘩伊
人事之有茲顧痛傷而何極然則荀龍賈虎大馮小馮雖
嗟松壠之長歸終慶荆枝而繼茂永言歡好寧怠初終幸
明靈之一臨鑒此丹赤嗚呼哀哉

欽定全唐文卷八百二十七目錄

牛叢

報坦綽書

責南詔蠻書

孫榮

北里誌序

陸宸

封棣王虔王沂王遂王制

授朱崇節河陽節度使制

授周岳嶺南西道節度使制

授陳珮廣州節度使制

授李壽盧龍軍節度使制

授周岳湖南節度使制

授張鐔彰義軍節度使制

授趙凝檢校太尉開府制

授石善友鎮武節度使滕存免邕州節度使制

崔允武安軍節度平章事制

韋承造

釋武豹門記

李知元

古塿記

欽定全唐文卷八百二十七

牛叢

叢字表齡宰相僧孺子第進士累官睦州刺史咸通末拜劍南西川節度使僖宗幸蜀授太常卿還授吏部尚書嗣襄王亂客死太原

報坦綽書

十二月二十四日劍南西川節度觀察安撫使守兵部尚書成都尹牛叢致書於雲南詔國坦綽麾下專人遽到示翰忽臨承統押師徒來及近界竊以詔國自爲背叛積有

歲年乃祖出於六詔之微非是西夷之長禹會塗山之日
不得預萬國之名舜巡方嶽之時不闕見五年之華我大
唐德宗皇帝仁沾動植信及豚魚子育兆民君臨四海憫
其傾誠向化率屬來王遂總諸蠻令歸君長仍名詔國永
順唐儀賜孔子之詩書頒周公之禮樂數年之後藹有華
風變腥羶蠻貊之邦爲馨香禮樂之域豈期後嗣罔效忠
誠累肆猖狂頻爲妖孽自四五年來侵凌我疆土圍逼我
城隍蓋以姑務含容不虞搪突遂令克醜肆害生靈況乃
毗橋喪師淹江敗績於何今日不改前非妄設奸欺詐言

朝覲輒舉螳螂之臂大興豺豕之心仍構狂詞乃云假道
所要於蜀王殿安下五日即便前去者且先代帝王之宮
也豈外邦蠻貊以居之是必天怒鬼誅殞身喪國以爾欲
其褻瀆示彼誠懲況天設華夷國分大小小當事大夷不
亂華豈有興動蠻師甲兵侵臨天子藩屏必是坦綽數盡
之歲殄滅之秋不然何以不恤其民妄動於衆一旦天子
赫怒諸侯會兵長驅渡瀘之師深入鑄柱之境必不更七
擒七縱即須翦蔓除根當此之時後悔無及坦綽今旣離
彼巢穴犯我封圻當道已排比戰場點戈甲雄師十萬

驍騎五千即遂鼓行併令擒戮所差王保誠四十人送書
並已囚繫候於軍前用以釁鼓今發遣鄮隴段首遷二人
持報書望詳覽不具某白

謹案成都文類咸通十四年兵部尚書牛公叢除劍南西川節

度使十二月坦緯至雅州差使送書上川主云此時止欲專詣京都懇求朝見論理枉遭讒間隔絕梯航冀與尚書繼好息民朝來暮往今古假道貴府請於蜀王殷安下三五日即前進公覽書驚駭乃復書云云

責南詔蠻書

詔王之祖六詔最小夷也天子錄其勤合六詔爲一俾附
庸成都名之以國許子弟入太學使習華風今乃自絕王
命且蛇雀犬馬猶能報德王乃不如蟲鳥乎比成都以武

備未修故令爾突我疆場然毗橋施江之敗積齒附城不
四年復來今吾有十萬衆捨其半未用以千人爲軍十軍
爲部驍將主之凡部有强弩二百鎗斧輔之勁弓二百越
銀刀輔之長戈二百掇刀輔之短矛二百連鎚輔之又軍
四面面有鐵騎五百悉收芻薪米粟牛馬犬豕清野待爾
吾又能以旁騎畧爾樵采我日出以一部與爾戰部別二
番日中而代日昃一部至以夜屯月明則戰黑則休夜半
而代凡吾兵五日一殺敵爾必晝夜戰不十日懜且死矣
州縣繕甲厲兵犄角相從皆蠻之深讐雖女子能齟齬薄

賊況强夫烈士哉爾祖嘗奴事西番爲爾仇家今顧臣之
何恩讐之戾耶蜀王故殿先世之寶宮非邊夷所宜舍神
怒人憤坦綽且死謹案此文從新唐書採出上篇報坦綽
書從成都文類採出二篇事同文異今
並載存證

孫榮

榮字文威官中書舍人

北里誌序

自大中皇帝好儒術特重科第故其愛壻鄭詹事再掌春
闈上往往微服長安中逢舉子則狎而與之語時以所聞

質於內庭學士及都尉皆聳然莫知所自故進士自此尤
盛曠古無儔然率多膏粱子弟平進歲不及三數人由是
僕馬豪華宴游崇侈以同年俊少者爲兩街探花使鼓扇
輕浮仍歲滋盛自歲初等第於甲乙春闈開送天官氏設
春闈宴然後離居矣近來延至仲夏京中飲妓籍屬教坊
凡朝士宴聚須假諸曹署行牒然後能致於他處惟新進
士設筵顧吏故便可行牒追其所贈之資則倍於賞數諸
妓皆居平康里舉子新及第進士三司幕府但未通朝籍
未直館殿者咸可就詣如不恡所費則下車水陸備矣其

中諸伎多能談吐頗有知書言語者自公卿以降皆以表德呼之其分別品流衡尺人物應對非次良不可及信可輟叔孫之朝致楊秉之惑比常聞蜀妓薛濤之才辯必謂人過言及覩北里二三子之徒則薛濤遠有慙德矣予頻隨計吏久寓京華時亦偷游其中固非興致每思物極則反疑不能久常欲紀述其事以爲他時談藪顧非暇豫亦竊俟其叨忝耳不謂泥蟠未伸俄逢喪亂鑿輿巡省嶠函鯨鯢逋竄山林前志掃地盡矣靜思陳事追念無因而久罹驚危心力減耗向來聞見不復盡記聊以編次爲太平

遺事云時中和甲辰無爲子序

陸宸

宸初名允迪字祥文宰相贄族孫光啟二年進士累進翰林學士中書舍人尚書左丞封嘉興縣男徙戶部侍郎同中書門下平章事進中書侍郎歷工兵戶三部尚書封吳郡公爲崔允所譖貶沂王傳分司東都授吏部尚書再貶爲濮州司戶參軍被害白馬驛年五十九

封棣王虔王沂王遂王制

門下我國家奄宅中區光啟祖業析珪胙土唯親與賢故

本根茂而枝葉榮王室尊而藩屏壯肆予眇末叨獲纂承
賴至道之元慈鍾列聖之餘慶顧茲允嗣實謂蕃昌爰稽
典謨用建邦土第三男昶星辰毓粹岳瀆降靈早彰岐嶷
之姿克稟徇齊之度第五男禊龜龍應瑞鵬鶚凌空溫恭
自得於天和穎悟實由於神賦第六男璆琳挺秀鸞鷟
呈祥爰當好弄之年雅號夙成之器第七男禕珠璣耀彩
箇籀含貞風神潛茂於端莊質性已彰於惠敏而皆生知
孝敬志樂文儒問安靡曠於晨昏稟訓每由於詩禮智有
刻舟之妙辯多對日之奇是宜分以白茅錫其朱邸叶犬

牙於漢制光麟趾於周詩厭次名邦境連於齊魯南康奧壤上接於荆吳瑯琊敦儒素之風遂寧實阜殷之俗咸稱重地各服徽章於戲器以琢成道由學顯勉稟君親之教敬承友傳之規勿追平樂之歡無好任城之勇懋建厥德永孚於休祠可封棣王襖可封虔王禋可封沂王禕可封遂王仍令所司擇日備禮冊命主者施行

授朱崇節河陽節度使制

門下朕聞天垂星緯王者象之以設官地裂山河歷代定之以建國所以咽喉中夏藩屏皇家非威望不足以鎮寧

非仁惠不足以撫養其有勲勞夙著宜申胙土之恩韜畧
素精屢委殿邦之任二者兼備斯爲得人國有彝章我復
何愛前昭義軍節度使潞慈邢洺等州觀察處置等使特
進檢校司空兼潞州大都督府長史御史大夫上柱國沛
縣開國子食邑五百戶朱崇節雄畧縱橫忠誠貫直夙著
總戎之術常韜靖亂之謀臨危不屈於壯心多難益全其
大節去病辭第誓彰鍾鼎之勲王翦請田非爲子孫之計
日者平陽求瘼馮翊頒條隰川竟保於孤城汝海將繩其
弊俗其後孟津分閫上黨臨戎智謀潛契於著龜義烈彌

堅於金石擁衆而出陳兵以行指揮而神氣激揚叱咤而
寇讐惕息今則鄉閭顧慕士卒謳歌無金咸佇於竇嬰竹
馬思迎於郭伋是用再兼五教重委雙旌旣資董衆之能
仍舉疇庸之典於戲功名易守自伐者必顛富貴可圖懷
驕者難保失道則禍生旋踵守義則福貽後昆勉爾令圖
服我明訓可依前檢校司徒充河陽節度使散官如故

授周岳嶺南西道節度使制

門下夫山結川融皆予之寓縣蠶衣租食悉我之黎元慘
舒雖繫於陰陽覆燾豈殊於遠邇自頃中原搔擾遐裔阻

難或王澤不流或國章靡及念茲黔首系我皇風聿求養理之仁兼藉鎮寧之畧訪於執事果得能臣武安軍節度湖南觀察處置使特進檢校右僕射食邑三百戶周岳黃石傳符豐城得劍倜儻挺義夫之節縱橫抱名將之才擐甲執兵閫外以雄豪見許絕甘分少江東以信義相推嚴武備而不喜戰爭頒吏術而每先恩惠遂致塵清四鄙農勸三時鄉閭阜安卒乘雄富是用疇其懿績仗以英謀輟乳哺於賦鵠之鄉壯藩垣於獲象之郡爾其克膺重寄更茂嘉猷必令嶺嶠蠻陬欽我之風化無使黃金翠羽累爾

之清廉然後馬援威聲孟嘗介潔苟能礪操諒可齊名仍
推百越之封俾進三槐之秩恩不虛受爾其欽哉可檢校
司空充嶺南西道節度使餘並如故

授陳珮廣州節度使制

門下漲海奧區番禺巨屏雄藩夷之寶貨冠吳越之繁華
苟非令人難著清節列聖睠念必求賢良故宋璟播美於
前李勉垂芳於後朕初君臨寓縣方以武定藩維獨命卿
往鎮茲土而崇龜果以清淨爲理謳歌日聞固追詠於夷
齊豈慙名於宋李代其任者不亦難乎爰求勲舊之間別

得英奇之士左軍都指揮使前靜江軍節度使開府儀同
三司檢校司徒平章事潁川食邑三千戶實封一百戶陳
珮雄姿岳聳俊氣鷹揚家傳忠孝之風代襲韜鈴之術愛
士卒而更逾吳起敬君子而不讓張飛位以功高名由義
振先皇帝薦臻艱運再幸侯封挺身於版蕩之中竭力於
阡危之際或警巡於西蜀或侍從於南梁殄岐陽兵火之
災爾功居最戡京國宗祧之難爾効復多皎潔忠誠貫黃
河而不濁堅貞壯節冒烈火而寧焚雖衛鼎銘勲韓壇受
律未遑列土豈答豐功是命殿彼大都授其峻秩乃示優

崇之旨再兼台衮之榮於戲吳隱之昔號清廉英聲未泯
馬伏波嘗推功業厥跡猶存苟能視糠粃於翠羽明珠張
紀律於遐陬異俗吳馬之政今古寧殊無使璟勉崇龜獨
誇於前哲也勉服丕訓無替令猷可檢校太保同平章事
充嶺南道節度使餘並如故

授李籌盧龍軍節度使制

門下召爽舊邦燕昭故國其地廣而要其俗勁而雄儻非
英偉之才孰控臨戎之任詢於執政爰有良臣具官李籌
荆鍾利器構厦宏材負頗牧之威名蘊關張之節槩風明

金史卷之五
卷之五
軍志妙揣敵情訓戎兼務於詩書養士必加於觴豆日者
咸推友悌實倅元戎屢參必勝之謀常贊在和之義洎專
庶務益洽羣情翬翬仰愛日之恩疆場賴仁風之固是用
寵其龍節榮彼鵠原俾登韓信之壇仍進王祥之秩爾其
稟我王度振乃家聲推信義以睦鄰封謹法令以威藩落
武有備而不用士使樂而不驕四者聿修七德斯在服我
明訓厥惟欽哉可檢校太保幽州大都督府長史盧龍軍
節度使餘並如故

授周岳湖南節度使制

門下荆渚懷仁陶侃昔嘗再理潁川思義黃霸於是重臨
苟徇人情何傷國體而況干戈久試宵旰爲憂將蘇塗炭
之災俾復旌旄之任詢於執政僉曰嘉謀具官周岳早洞
武經兼通政術嘗鎮湘中之地克揚閩外之威執紀律以
不踰播謳謠而甚遠拊封彌謹述職惟勤垂竹帛之功名
委旌幢之貴寵而遽因疑閒遂致遷移適五嶺之遐荒奪
重湘之奧壤乃使軍戎憤悱黎庶怨咨煙塵不絕於累年
瘡痍偏傷於一境旋聞軍吏之衆耆老之徒咸詣護戎借
畱賢帥遭權臣之擁遏致明命之稽延今我朝政惟新庶

事思理雪爾肺腸之憤申予雨露之恩俾殿舊邦用諧衆志爾其速蘇彫瘵無念仇讐戢矛戟之連營勸農桑於列郡布予惠澤服我徽章茂繼前勲永膺重寄可依前檢校司徒武安軍節度使餘並如故

授張鐔彰義軍節度使制

門下隴陰重地涇上雄藩勵控弦帶甲之徒資護塞和戎之畧爰自動知邊事夙練兵機加以制彼西陲屏於中夏博採輿人之論果聞良帥之才爰降命書式諧衆欲具官張鐔雷霆勁氣鵬鶚奇姿秉孝愛以承家挺忠直而事主

玉鈴金匱弟兄咸繼於孫吳雪嶺蕭關蕃虜遠懷於頗牧
矧示令委殿於是邦著勲烈於兩朝耀威名於一紀訓兵
積粟述職安邊城隍元固於金湯士卒必均於觴豆功垂
竹帛政洽謳謠並馳賢將之名仰自元昆之訓豈謂降年
不永閔水生悲將繼前修是資同氣設齋壇而錫命馳瑞
節以頒恩式光十乘之雄不改三槐之秩爾其奉子紀律
固乃封疆推誠信以睦鄰竭忠勞而報國自可委安祿位
益茂功名於戲爾鐔服我明訓可檢校司徒彰義軍節度
使餘並如故

授趙凝檢校太尉開府制

門下王者裂土疆以任材臣下推腹心以報主能任其材則國理能報其主則功高其有鎮撫巨藩訓齊義旅克展忠貞之効每遵紀律之條斷自予懷將頒殊渥具官趙凝倜儻雄材縱橫奧畧奮垂天之羽翰聳發地之巖巒頃纂舊封克承先訓嚴武備而不矜戰伐緩軍令而不虐惇嫜鄉閭阜殷卒乘輯睦顧峴首漢陽之地實四會五達之莊扼咸鎬之咽喉導荆吳之貢賦途路無梗舩航若流不有威聲孰能通好朕以姦克構患都邑縱兵爰避艱虞出居

巖險而能徑馳專使來達臣誠乃陳底貢之儀備驗輸忠之節況爾先父實余蓋臣前勲尚煥於鼎鍾令嗣克傳於弓冶永言念舊尤在賞新俾升掌武之班益重拊封之寄仍遷峻級式示隆恩爾其保祿位以榮家竭忠勞而許國勉欽明訓無忝厥官可開府儀同三司檢校太尉平章事充忠義軍節度使餘並如故

授石善友鎮武節度使滕存免邕州節度使制

門下朔野雄藩地臨於強虜海濱巨屏境接於諸蠻苟非威畧不足以鎮寧非和惠不足以綏撫其有久專畱務具

著能名雅稱分閫之才宜賜登壇之命具官石善友夙知
邊事素練戎韜驍騁風無遠不適具官滕存免早習兵
機常推忠款豪曹出匣其銳難當而能誓建功名克遵紀
律洎膺試用咸務恪恭封疆遠憚其威聲溪洞每懷其信
義固可以靜茲絕塞阜彼遐陬使風煙罷警於北陲琛賁
遠臻於中土方資重委宜洽優恩俾真旄鉞之權用壯藩
宣之寄或榮遷端揆或寵陟秋官勉竭厥誠貳則有辟善
友可檢校右僕射充鎮武節度使兼安北都護存免可檢
校刑部尚書嶺南道節度使餘如故

崔允武安軍節度平章事制

門下入居巖朝施明畧以匡時出陟齋壇運沈機而鎮俗
苟非材推命代望重當朝則何以宣我武威易其風俗朕
志先定僉謀允成持危匡聖致理功臣金紫光祿大夫守
禮部尚書兼中書侍郎同中書門下平章事兼集賢殿大
學士判戶部事上柱國清河郡開國侯食邑一千戶崔允
文星垂耀神岳標奇襲禮樂之清風冠簪纓之貴胄佩觿
之際潛韜經濟之才筮仕以來尋積公輔之望洎更華胄
益振全圖居論思而獻替盡忠提綱紀而回邪斂跡旋自

繁劇俾司燮調苟利於君無所不至洎寵蒲坂再秉洪鈞
時謀明合於著龜雅操不踰於風雨作礪之業爲時而生
乃睠重湖實維奧壤薦臻多難屢易元戎哀彼征人闕我
皇天間爾嘗隨重幣往曳長裾迄今鄉閭尚播詩詠是用
拯彼塗炭宣予惠和假其問喘之仁慰彼來蘇之望仍持
相印式寵名臣暫追羊杜之政能未免皋夔之事業往踐
厥位爾惟欽哉可檢校禮部尚書同中書門下平章事功
臣散官勲如故充義安軍節度湖南管内觀察處置觀察
等使使持節潭州諸軍事守潭州刺史

韋承造

承造乾符二年官絳州刺史

釋武豹門記

往之事不知者多以故老之傳而實之舛生於訛以至大
謬至若正氣爲邪氣所偏本非正氣也蓋疑生於莫析以
逮於言思耳愚咸通甲午歲孟春月十有七日奉天子詔
來牧茲郡之人以武豹門爲祛邪禦魅之所作也其門北
向左畫白虎執以蒼頭之手右畫大豕拒以雄武之威門
之東壁有刻石焉乃故大光祿李公暨前牧是邦爲文以

解之義與夫郡人之說不貳也又曰圖於寢室悅悅焉疑有所壓愈不知其所由來者矣適有多才能之士胡姓承裕名爲愚釋之曰是州也其宅東西廣正北傾後無乾地南北嶮巇林木森聳水自北來山勢崗阜即是八難地而武豹門正當九苦風時俗以武豹爲辟邪按韓王元嘉始創之旨乃以五行所尅勝其災而滅之禍武屬木以木臨亥位故以豕承之寅主東方故畫東垣豹主西方故誌西壁禦禍之風制空之位一其義也今愚所築池北望月臺池南釣絲臺亘及此門中架虹梁正與韓之設色三獸暗

合其理也愚故命筆書之庶將釋惑表異爲後君子信與不信耳時乾符二年四月六日絳州刺史韋承造記

李知元

知元懿僖時人

古塏記

天下湘山祖師聖化主人無量壽佛入寂幾十霜矣奉遺命以肉身垂化及今浮圖成奉佛出龕入焉聖貌如生毫光時現真世希有事也佛降神天壽之鄉垂像五華之地珠投周室鉢出徑山法諱全真別號宗慧先年雲遊至縣

選勝湘山結茅爲院名曰淨土十力神圓六通智足慈育
萬有道濟百靈不擾人天耕畬自給處世說法利益無邊
來者如歸視道若咫尺太和之末沙汰僧尼會昌五年焚毀
刹院佛以覺照先事深藏風移益高挺然獨立衣冠殊制
名號不倫衣曰無量壽衣冠曰真空法冠髭髮不剃老少
不常不念經不禮佛乃自號真空法身周主人又嘗謂修
行猶落色空見我所以超凡透色空過真空乃入無量量
絕無無量那得非無量主人大中初佛教重興兼苦旱久
邑人乃入覆釜迎佛還山雨暘時若物和歲豐民安其生

俗蒸以變蓋居然一極樂國也製教十二部部十二卷命
曰遺教經又其徒彙錄湘山百問行世咸通八年二月初
八日辰時忽召衆謂無色天請吾設法旣而偈畢趺坐而
逝遂卜於山之中峯笋布臺下建院迎龕上供踰二七夜
放白毫相光十一道光中現十有一佛如是者彌月乾符
甲午夏劉相公瞻從驩州召還過湘源以佛與同郡詣院
供香見紫雲迴翔其上蠲縑一笥助修浮圖於是淨土院
三會長徧募諸方就供所地庀材鳩工經營兩載乃峻厥
役官僚信士大集齋供以慶之時則乾符三年歲次景申

二月己酉朔十二日庚申也知元濫蒙衆請據事直言刊
石墻門永播終古